

10.07.2026

UKA2026/280

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalakkersuisut kingusinnerpaamik UPA2027-imi Radiukkut tv-kkullu aallakaatitsisarneq pillugu Inatsisartut inatsisaata nr. 7-ip, 8. juni 2014-imeersup allanngortinneqarnissaanut siunnersuummik saqqummiussinissamut kiisalu nalunaarasuartaatitigut atassuteqarneq nalunaarasuartaatitigullu kiffartuussinerit pillugit inatsisinut allannguutininik pisariaqartunik suliaqarnissamut peqquneqarnissaat pillugu Inatsisartut aalajangiiffigisassaattut siunnersuut. Allannguutini qulakkeerniarneqarpoq kalaallit radioqarfiisa tv-qarfiisalu akuersisummik pigisaqartut nuna tamakkerlugu ammasumik, naligiimmik teknologimullu aalajangersimasumut pituttorneqanngitsumik siammarterneqarsinnaanissaat, KNR-imi pilerisaarutit aallakaatitassiallu niuernerpalaartumik aningaasaliiffigineqartut atorunnaarnissaat kiisalu Inatsisartuni ataatsimiinnerit tamanut ammasut toqqaannartumik aaqqissorneqarnatillu aallakaatinneqartarnissaannut nuna tamakkerlugu immikkut radiukkut kanalimik pilersitsisoqarnissaa.

(Inatsisartunut ilaasortaq Pele Broberg, Naleraq)

Tunngavilersuut:

Kalaallit Nunaanni nutaaliaasumik tusagassiuuteqarnissaq pisariaqartinneqarpoq, nutaarsiassat oqallinnerlu nunap immikkoortuini tamani suliarineqarsinnaallutillu nuna tamakkerlugu anngunneqarsinnaaqqullugit.

Malittarisassat atuuttut naapertorlugit nunaqarfigisami aallakaatitsisinnaanermut akuersissut aallaaviatigut kommunip pineqartup killeqarfiata iluani atuuppoq, radioqarfilluunniit tv-qarfilluunniit ataatsikkut nunaqarfigisami nuna tamakkerlugulu aallakaatitsisinnaanermut akuersisummik peqarsinnaanngilaq. KNR aamma pilerisaarutininik aallakaatitassianillu aningaasalersorneqartunik aallakaatitsisinnaavoq. Pissutsit taakku allanngortinneqarnissaat siunnersuummi anguniarneqarpoq.

Kalaallit radioqarfii tv-qarfiilu akuersisummik pigisaqartut nuna tamakkerlugu siammarterneqarsinnaasariaqarput, nunaqarfigisami radioqarfittut tv-qarfittulluunniit inissisimanertik annaanagu. Attaveqaasersuutit pisariaqartut, Tusassip attaveqaasersuutai ilanngullugit, ammasumik, naligiimmik teknologimullu aalajangersimasumut pituttorneqanngitsumik atorneqarsinnaasariaqarput.

Assersuutigalugu Sisimiuni radioqarfik tv-qarfilluunniit nuna tamakkerlugu anngusinnaasariaqarpoq, nunaqarfigisami inissisimanini annaanagu. Innuttaasut kalaallit radioqarfiisa tv-qarfiisalu sorliit malinnaavigissanerlugit namminneq toqqarsinnaasariaqarput. Nuna tamakkerlugu siammarterineq KNR-imut kisimi periarfissaassanngilaq.

KNR-imi pilerisaarutit aallakaatitassiallu niuernerpalaartumik aningaasaliiffigineqartut atorunnaassapput. Innuttaasunik kiffartuussineq pisortanit aningaasaliissutitigut aningaasalersorneqassaaq, KNR-ilu pilerisaarutinit isertitassat pillugit tusagassiuutinut namminersortunut unammillissanngilaq.

Innuttaasunik kiffartuussineq sulii KNR-ip suliaassarissappagu, aningaasaliissutit akissarsiat sulinermilu atugassarititaasut ullutsinnut naleqquttut qulakkeernissaannut naammattariaqarput. Tusagassiortut namminersorlutik suliaqarsinnaasariaqarput oqartussaasunillu nakkutilliisinnaallutik.

Peqatigisaanik nuna tamakkerlugu immikkut radiukkut kanalik pilersitsisoqassaaq, Inatsisartuni ataatsimiinnerit oqallinnerillu tamanut ammasut toqqaannartumik aqqissorneqarnatillu aallakaatinneqartassallutik. Inatsisartuni ataatsimiittoqannginnerani oqallinnerit aallakaateqqinneqartassapput, kanali aamma nipilersornermut, kulturimut imaluunniit innuttaasunik kiffartuussinermut allanut atorneqarsinnaassalluni.

Inatsisartut-kanalip ingerlanneqarnera KNR-imut imaluunniit ingerlatsivimmut allanut naleqquttumut isumagissassanngortinneqarsinnaassaaq.

Pisortanut aningaasatigut allaffissornikkullu kingunerisassat

Inatsisinik allannguinnissaq, teknikkikkut piumasaqaatinik suliaqarnissaq isumaqatigiissutinillu pisariaqartunik allannguinnissaq AC-tut atorfillit pingasut ukiumut sulinerisa nalingat tikillugu pisariaqartitsisinnaasoq missingerneqarpoq, tassa 1,5 mio. kr.-it.

KNR-imi pilerisaarutit aallakaatitassiallu niuernerpalaartumik aningaasaliiffigineqartut atorunnaarpata, isertitat annaaneqartut innuttaasunik kiffartuussinermut aningaasaliissutitigut matussuserneqassapput.

Nuna tamakkerlugu siammarterinerimut annertunerusumik attaveqaasersuutitik pisariaqartitsineq Inatsisartut-kanalillu pilersinneqarnera qanoq akeqassanersut maanna qularnaatsumik naatsorsorneqarsinnaanngillat. Naalakkersuisut aningaasartuutit inatsisissatut siunnersuummut atatillugu naatsorsussavaat Inatsisartunullu saqqummiullugit. Attaveqaasersuutit isumaqatigiissutillu pioreersut teknikkikkut periarfissaqartillugu atorneqassapput.

Namminersorlutik inuussutissarsiortunut aningaasatigut allaffissornikkullu kingunerisassat

Kalaallit radioqarfii tv-qarfiilu nunaqarfigisamiittut namminersortullu namminneq nuna tamakkerlugu attaveqaasersuutitik pilersitsinngikkaluarlutik nuna tamakkerlugu tusarnaartunut isiginnaartartunullu anngussinnaalissapput.

Aqqissuussinermut ilanngunneq nammineq piumassutsimik pissaaq, ammasumik, naligiimmik assigiinngisitsisoqanngitsumillu atugassaqartitsisoqassalluni.



KNR-imi pilerisaarutit atorunnaarsinneqarnerat tusagassiuutit namminersortut nunaqarfigisamiluittut pilerisaarutinit isertitaqarnerannut iluaqutaasinnaavoq.

Innuttaasunut aningaasatigut allaffissornikkullu kingunerisassat

Innuttaasut Kalaallit Nunaanni nutaarsiassaqaqtitsivinnut amerlanerusunut, nunaqarfigisami radioqarfinnut tv-qarfinnullu politikkikkullu oqallinnernut periarfissaqarnerulissapput.

Pisortanit aningaasalersorneqartunut kanalinut Inatsisartuniillu toqqaannartumik aallakaatitsinernut isersinnaaneq aallaaviatigut immikkut akiliuteqarfigineqassanngilaq.